

PEFC Norge
mail@pefc.no

Uttale til forslag til revidert Norsk PEFC skogstandard

Rogaland skognæringsforum viser til høringsbrev datert 11.04.22.

Norsk PEFC skogstandard er blitt ein viktig faktor i all næringsmessig skogsdrift. Dei aller fleste kravpunkta vedkjem difor også kystskogbruket, men med varierende tyngde og følgjer.

Vi meiner forslaget til ny skogstandard er ei klar innskjerping i forhold til eksisterande standard. Dette vil kunna få negative følgjer både for skogbruket som næring, men også for arbeidet mot klimaendringar. Alt produksjonsareal som går ut av drift grunna restriksjonar vil redusera tømmerproduksjonen, og dermed redusera høve til å delta i det grønne skiftet med fornybare ressursar og klimabidrag.

Rogaland skognæringsforum er generelt kritisk til ei slik utvikling, og det er spesielt uheldig når vi er i ein situasjon med fare for store endringar i klima – og dermed også store endringar i naturmangfaldet. Mykje av argumentasjonen for innstramming av skogsdrift verkar slik sett utdatert.

Vi ønskjer i første rekkje å kommentera kravpunkta 8 Bevaring av skogarealet, 20 Bruk av utanlandske treslag og 21 Påskoging og treslagsskifte.

Kravpunkt 8 Bevaring av skogarealet

Det går føre seg ei stadvis storstilt avskoging. Dette skuldast omdisponering av skogareal til anna bruk, og det skuldast manglande kvalitet på forynging etter hogst. Langs kysten skjer gjerne avskoginga på dei rikaste og mestproduserande areala, både når det gjeld skogproduksjon og biologisk mangfald.

Rogaland skognæringsforum er slik sett positiv til at dette kravpunktet er noko innskjerpa i høve eksisterande punkt. Vi er likevel usikre på korleis dette punktet blir følgt opp av dei ansvarlege.

Ei næring som i tillegg til leveranse på friluftsliv og biologisk mangfald, også har ei stor samfunnsoppgåve med krav om leveranse både på klimaområdet og fornybart råstoff inn i det grønne skiftet, treng gode og effektive produksjonsareal.

I dag skjer det langs kysten ei storstilt omdisponering av dei beste skogareala, dels til utbygging til infrastruktur, industri og bustader og dels til varig endra oppdyrka areal. Dette går hardt utover både klimaarbeidet, biologisk mangfald og sjølvstekt den fornybare tømmerproduksjonen.

Kravpunkt 20 Bruk av utanlandske treslag

Rogaland har, som store delar av kysten, svært gode produksjonsareal for kvalitetsskog til bruk inn i det grønne skiftet. Men vi har i liten grad stadeigne treslag som kan utnytta desse areala på ein god måte. På store delar av arealet kan vi med god effekt nytta vanleg norsk gran. Den finst naturleg i fylket, men berre på avgrensa areal.

Særleg i ytre, men også dels i midtre strok av fylket er klimaet sterkt påverka av havet, med bl.a. vind og saltrok. Norsk gran fungerer difor ofte dårleg, men sitkagran får lett ein produksjon på 1-2 m³/daa på slike areal. I delar av fylket har vi også store areal der lerk er det beste treslaget, med høg produksjon av kvalitetsvirke. Også fleire andre treslag viser høg produksjon av kvalitetsvirke – og dermed også høg og langvarig karbonbinding.

På denne bakgrunn er Rogaland skognæringsforum sterkt kritisk til den innskjerpa haldninga til gode produksjonstreslag som kjem fram i forslag til ny standard.

Vi meiner punktet slik det er utforma, ikkje er berekraftig. Det tek heller ikkje innover seg dei klimaendringane vi alt ser, og som vil bli tydelegare med åra. Med så rigide krav til ulike treslag, vil vi komma i ein situasjon der ein større del av det produktive skogarealet langs kysten ikkje kan nyttast fordi vi ikkje har 'lovlege treslag' som kan utnytta arealet til kostnadseffektiv og karbonbindande produksjon.

Kravpunkt 21 Påskoging og treslagskifte

Skogbruk er ei arealkrevjande næring. Men med god planlegging og bruk av dei rette treslaga, vil behovet for areal bli mindre, gitt same produksjonsvolum.

Tilgroinga skjer i stort tempo, og difor minkar det på snauareala som kan vera aktuelle for kvalitetsproduksjon av tømmer. Derimot finst det svært store areal under gjengroing. Det er i hovudsak dunbjørk som er hovudtreslaget på slike areal, og det biologiske mangfaldet endrar seg naturleg nok i takt med gjengroinga.

Felles for desse areala er dei gir lite eller ingen verdiskaping og lite karbonbinding. I dagens situasjon med klimakrise og eit samfunn i overgangen til det grønne skiftet, er det store samfunnsgevinstar i å treslagskifta deler av desse store areala. Det er difor også store samfunnstap ved å la vera å ta desse areala i bruk.

Rogaland skognæringsforum er difor sterkt kritisk til resultatet av forhandlingane på dette kravpunktet. Det vil i stor grad hindra landet i å ta i bruk effektive og rimelege tiltak mot klimakrisa. Resultatet kan fort bli ei forverring av både klimakrisa og miljøkrisa, definert som endringar i biologisk mangfald.

Avslutning

Det er bra at skognæringa og mange interesseorganisasjonar set seg saman for å finna gode vegkart for bruk av dei mange ulike funksjonane skog og skogareal har. Rogaland skognæringsforum meiner forslaget til ny PEFC skogstandard har altfor stor slagside, og difor ikkje gir eit godt nok vegkart for berekraftig bruk av skogen og skogareala langs kysten dei neste åra. Omsynet til auka behov for fornybare og klimavennlege ressursar er stemoderleg behandla.

Stavanger, 8.6.2022

Med helsing
Rogaland skognæringsforum

Olaf Gjedrem s/
styreleiar

Lars Slåttå s/
rådgivar